

## KA GOSPEL U IOANNIS

### 1

**1** Ha kaba mynnyngkong u la don U Ktien, bad uta U Ktien u la don bad U Blei, bad uta U Ktien u la long U Blei. **2** Une u la don ha kaba mynnyngkong bad U Blei. **3** Da u la long kiei-kiei baroh, bad khlem ma-ym shym la long kaei-kaei-ruh kaba la long. **4** Ha u la don ka jingim; bad kata ka jingim ka la long ka jingshai jong ki briw. **5** Bad kata ka jingshai ka shai ha kaba dum; hynrei kata kaba dum ka'm pdiang ia ka. **6** La mih u briw ba la phah da U Blei, uba kyrteng U Ioannis. **7** Une u la mih-noh ia ka ba'n phla, ba u'n iohphla shaphang uta U Jingshai, ba baroh ki'u iohngeit da u.

**8** U hi u'm long uta U Jingshai, hynrei u la mihnoh ba u'n ioh-phla shaphang uta U Jingshai. **9** Uta u la long U Jingshai uba shisha, uba'n sa wan ha ka pyrthei, uba pynshai ia ki briw baroh. **10** U la long ha ka pyrthei, bad ka pyrthei ka la long da u, pynban ka pyrthei ka'm shym la ithuh ia u. **11** U ia wan sha kiei-kiei la ki jong, bad kita kiba dei la ki jong ki'm shym la pdiang ia u. **12** Hynrei kat kiba la pdiang ia u, ha kito u la ai bor ba'n long ki khun U Blei, kata ha kita kiba ngeit ha ka kyrteng jong u: **13** kiba la kha, ym na ka snam, l'ymne na ka mon ka doh, l'ymne na ka mon u briw, hynrei na U Blei. **14** Uta U Ktien te u la kynja doh, bad u la shongsah ha pdeng jong ngi, bad ngi la ioh khmih-shain ia ka burom jong u, ka burom kaba da kat ka jong uba la kha-marwei na U Kpa, ba la dap da ka jingaiei bad ka jingshisha. **15** (U Ioannis u phla shaphang jong u, bad u la pyrta u da ong, une long uta, ia uba nga la ong, Uta uba wan nadien jong nga, u la jia-long shuwa jong nga: naba u la ghuwa ia nga.) **16** Bad na ka jingdap jong u, ngi baroh ngi la ioh pdiang, bad ka jingaiei kaba da kat ka jingaiei. **17** Naba ia ka hukum la ai da U Moses; hynrei ka jingaiei bad ka jing-shiaha ki la wan da U Jisu Khrist. **18** Ym don mano-manoruh ba la loh-i ia U Blei mynno-mynno-ruh; uta U Khun ba la kha-marwei, uba long ha ka shadem U Kpa, u hi u la pynpaw ia u.

**19** Kane te ka long ka jingphia U Ioannis, mynba Ki Jiw ki la iaphah na Jerusalem ia ki lyngdoh bad Ki Lebi ba'n kylli ia u, Me long uei? **20** Te u la phla, bad u'm shym la len, bad u la phla, Nga nga'm long uta U Khrist. **21** Te ki la iakylli ia u, Kumno te? me long U Elias? U ong te, Nga'm long. Me long uta u nongiathuhlypa? U la iathuh ruh, Em. **22** Haba kumta ki la iaong ha u, Me long uei te? ba ngi'n ioh iathuh ha kita kiba la phah ia ngi. Kumno me ong shaphang ia lade? **23** U la iathuh, Nga long ka ktien jong uba pyrta ha ka ri-khlaw To phi'n pynbeit ia ka lynti U Trai, kumba ong U Isaiah a nongiathuhlypa. **24** Kita te ia kiba la phah kl la long na Ki Pharisi. **25** Te ki la iakylli ia u, bad ki la iaong ha u, Hato balei ba me pyn-baptis, haba me me'm long uta U Khrist l'ymne U Elias, l'ymne uta u nongiathuhlypa? **26** U Ioannis u la iathuh ha ki, u da ong, Nga nga pynbaptis da ka um: hynrei don uba ieng ha pdeng jong phi, ia uba phi phi'm ithuh; **27** uta uba wan nadien jong nga; uba la jia long shuwa jong nga; uba nga nga'm long uba bit ba nga'n ioh loit-noh wad ia ka jingteh ka juti jong u. **28** Ia kine kiei-kiei-ruh la leh ha Bethania, sha shilliang Ka Jordan, ha kaba U Ioannis u pynbaptis.

**29** Ha kaba lashai U Ioannis a ioh-i la U Jisu ba u wan ha u, bad u ong, Ha khmih, U Khun-lang-prot jong U Blei, uba kit-noh ia ka pop ka jong ka pyrthei! **30** Dei une ba nga la ong shaphang jong u, U briw u wan nadien jong nga, uba la jia long shuwa jong nga: naba u la shuwa ia nga: **31** nga te nga'm pat shym la ithuh ia u: hynrei khnang ba yn pynpaw ia u ha Israel, namar-kata kein nga la wan pynbaptis da ka um. **32** U Ioannis u la phla ruh, u da ong, Nga la ioh-i ia U Mynsiem ba u hiar kum ka paro na bneng, bad u la sah halor jong u: **33** nga te nga'm pat shym la ithuh ia u: hynrei uta uba la phah ia nga ba'n pynbaptis da ka um, uta u la lah ong ha nga, Uta halor uba me'n ioh-i la U Mynsiem ba u hiar bad ba u sah balor jong u, dei ata kein uba pynbaptis da U Mynsiem Bakhuid: **34** te nga la ioh-i, bad nga la phla ba une u long U Khun U Blei.

**35** Ha kaba lashai pat U Ioannis a dang ieng, bad ar-ngut na ki synran jong u; **36** te haba u la khmihshain ha U Jisu katba u laid, u ong, Ha khmih, U

Khun-langbrot jong U Blei! **37** Kita ar-ngut ki synran te ki la ioh-sngew ia u ba u kren, bad ki la iabud ia U Jisu. **38** U Jisu te haba u la phai, bad ba u la ioh-i ia ki ba ki iabud, u ong ha ki, Phi iawad aiu? Ki te ki la iathuh ha u, Ko Babbi (ka ba'n ong, haba la batai, Ko Nonghikai), hangno me shong? **39** U ong ha ki, To ale, te phi'n sa ioh-i. Te ki la leit, bad ki la ioh-i hangno ba u shong, bad ki la iasah lem bad u ha kata ka sngi: te ka la long hamar kaba shiphew baje. **40** U Andriw u para U Simon Petros, u la long uwei na kita ar-ngut kiba la ioh-sngew na U Ioannis, bad kiba la iabud ia u. **41** Une u shem nyngkong ia u para jong u hi U Simon, bad u ong ha u, Ngi la shem ia U Messiah, (kaba long haba la batai, U Khrist.) **42** U la wallam ruh ia a ha U Jisu. U Jisu te haba u la khmih-shain ia u, u la ong, Me long U Simon u khun U Jona: yn khot ia me U Kephas, (kaba, haba la batai, U Maw.)

**43** Ha kaba lashai U Jisu u la mon ba'n leit-noh sha Galilaia, bad u shem ia U Philip, bad u ong ha u, To bud ia nga. **44** Te U Philip u la long na Bethsaida, na ka shnong U Andriw bad U Petros. **45** U Philip u shem ia U Nathanail, bad u ong ha u; Ngi la shem ia uta uba U Moses ha ka hukum, bad ki nongiathuhlypa ki la thoh shaphang jong u, la U Jisu kein, u khun U Joseph, uba na Nasaret. **46** U Nathanail te u la ong ha u, Ka lah kaei-kaei-ruh kaba bha ba'n long na Nasaret? U Philip u iathuh ha u, To ale, to khmih ruh. **47** U Jisu u la ioh-i ia U Nathanail ba u wan ha u, te u ong shaphang jong u, Ha khmih, u kynja-Israel, uba da shisha, ha u b'ym don kaba arsap. **48** U Nathanail u kylli ia u, Nangno me ithuh ia nga? U Jisu u la iathuh bad u la ong ha u, Shuwa ba u'm pat khot U Philip ia me, mynba me la don hapoh uto u dieng-dumbur, nga la ioh-i ia me. **49** U Nathanail u la iathuh bad u ong ha u, Ko Rabbi, me me long U Khun U Blei; me me long U S'iem jong U Israel. **50** U Jisu u la iathuh bad a la ong ha u, Naba nga la ong ha me, Nga la ioh-i ia me hapoh uto u diengdumbur, me ngeit? me'n ioh-i kein ia kiei-kiei-ruh kiba kham-khraw ia kine. **51** U ong ruh ha u, Shisha, shisha, nga ong ha phi, Phi'n ia ioh-i ia ka bneng ba la plie, bad ia ki angel U Blei ba ki iakiw, bad ki iahiar ha U Khun u briw.

**1** Ha kaba lal ka sngi te la don ka jingkhawai-shong-kurim ha Kana Galilaia: bad ka kmie U Jisu ka la don hangta. **2** La khot ruh ia U Jisu, bad ia ki synran jong u de, sha kata ka jingkhawai-shong-kurim. **3** Te haba la lut ka wain, ka kmie U Jisu ka ong ha u, Ki'm don wain shuh. **4** U Jisu u ong ha ka, Nga don kam aiu bad pha, ko ka briw? ka por jong nga ka'm put poi. **5** Ka kmie Jong u ka ong ha ki shakri, Ia kaei-kaei-ruh kaba u'n ong ha phi, phi'n leh kein. **6** Te la don hangta hynriw ki khra-um kiba da ki maw ba la buh khnang ia ka hiam jingpynkhuid jong Ki Jiw, kiba ngiam uwei-uwei kat ar ne lai mon. **7** U Jisu u ong ha ki, To pyndap ia kita ki khra da ka um, Te ki la pyndap shoin ia ki. **8** Ynda kumta u ong ha ki, To tong mynta, to rah ruh ha u nongsynshar ka jingkhawai. Te ki la wallam. **9** Te ynda uta u nongsynshar ka jingkhawai u la mad ia kata ka am ba-la-pynlong wain, bad u'm tip nangno ka la long; (hynrei kita ki shakri kiba la tong ia kata ka um ki la tip;) uta u nongsynshar ka jingkhawai u la khot la u nongleit-kurim, bad u ong ha u, **10** U briw baroh u ju buh ha khmat ia ka wain kaba bha nyngkong; bad ynda ki la iadih-bha, sa ia kaba kham-sniw: me pat me la tyngkal ia ka wain kaba bha haduh mynta. **11** Ia kane kaba nyngkong na ki kam-bah jong u, U Jisu u la leh ha Kana Galilaia, bad u la pynpaw ia la ka burom; te ki synran jong u ki la ngeit ha u.

**12** Hadien kane u la leit-hiar aha Kapernam, ma-u bad ka kmie jong u, bad ki para jong u, bad ki synran jong u de: hynrei hangta ki'm shym la iashong bun sngi.

**13** Te ka niam-ka-jinglait jong Ki Jiw ka la jan, bad U Jisu n la leit-kiw sha Jerusalem. **14** Bad u la shem ha ka templ ia kiba iadie ia ki masi bad ia ki langbrot, bad ia ki paro de, bad ia ki nongiapein-sbai ba ki da shong. **15** Te haba u la thaw ia u jingsympat na ki kynja jingieh, u la beh-noh shabar ia ki baroh na ka templ bad langbrot bad masi; bad u la theh-pashait-noh ia a sbai ki nongiapein, bad u la pynkyllon ia ki miej jong ki; **16** bad n la ong ha kita kiba iadie ia ki paro, To shim-noh ia kine kiei-kiei nangne; wat

pynlong ing-kha-i ia ka ing U Kpa jong nga. **17** Te ki synran jong u ki ia iakynmaw, ba don kaba la thoh, "Ka jingsngew-shitthem ia ka ing jong me ka bam-duh ia nga."

**18** Namar-kata Ki Jiw ki la iathuh bad ki la ong ha u, Ka dak aiu me pyni ha ngi, haba me leh ia kine kiei-kiei-ruh? **19** U Jisu u la iathuh bad u la ong ha ki, Phi'i pynjot ia kane ka templ, te lai sngi nga'n pynieng-pat ia ka. **20** Ynda kumta kita Ki Jiw ki la iaong, Sawphew hynriw snem shu dang tei ia kane ka templ, ma-me te lai sngi me'n pynieng-pat ia ka? **21** U hynrei u kren shaphang ka templ ka met jong u. **22** Namar-kata ynda la pynmih-pat ia u na ki nongiap, ki synran jong u ki la iakynmaw ba u la lah ong ia kane ha ki; te ki la ngeit ia ka jingthoh, bad ia kata ka ktien ia kaba la lah ong U Jisu.

**23** Te katba u dang don ha Jerusalem, ha kata ka jingkhawai-niam-ka-jinglait, shibun ki la ngeit ha ka kyrteng jong u, ynda ki la ioh-i ia ki dak phylla jong u ia kiba u la leh. **24** Hynrei U Jisu u'm shym la shaniah ia lade ha ki, naba u hi u ithuh ia ki baroh; **25** bad u'm da don kam ba uno-uno-ruh u'n phla shaphang u briw: naba u hi u la tip kaei kaba la don ha u briw.

### 3

**1** Te la don u briw uba na Ki Pharisi, uba kyrteng U Nikodimos, u nongsynshar jong Ki Jiw; **2** une u la wan ha U Jisu mynmiet, bad u la ong ha u, Ko Nonghikai, ngi tip ba me long u nonghikai uba la wan na U Blei; namar ym don uba lah ba'n leh ia kine ki kam-bah ia kiba me leh, l'ynda U Blei u long ryngkat bad u. **3** U Jisu u la iathuh bad u la ong ha u, Shisha, shisha, nga ong ha me, L'ynda kha pat ia u briw, u'm lah ban ioh-i ia ka hima U Blei. **4** U Nikodimos u ong ha u, Kumno lah ban kha ia u briw haba u la tymmen? u lah ba'n bsut pat sha ka kpoh ka kmie jong u, bad ba'n kha ia u? **5** U Jisu u la iathuh, Shisha, shisha, nga ong ha me, L'ynda kha ia u briw na ka um bad na U Mynsiem, u'm lah ba'n leit hapoh ka hima U Blei; **6** ia kaba la kha na ka jong ka doh, ka long doh; bad ia kaba la kba

na ka jong U Mynsiem, ka long mynsiem: **7** wat sngew-kyndit te ba nga la ong ha me, Ba ka dei ban kha pat ia phi: **8** ka l'er ka beh kat sha kaba ka mon; bad me ioh-sngew ia ka jing-sawa jong ka, hynrei me'm tip nangno ka wan, l'ymne shano ka leit: kumta long u briw baroh uba la kha na U Mynsiem. **9** U Nikodimos u la iathuh bad u la ong ha u, Kumno kine kiei-kiei-ruh ki lah ba'n long? **10** U Jisu u la iathuh bad u la ong ha u, Me long u nonghikai jong U Israel, bad me'm tip ia kine kiei-kiei-ruh. **11** Shisha, shisha, nga ong ha me, Ba ia kata kaba ngi latip ngi iakren, bad ia kaba ngi la ioh-i, ngi iaphla, hynrei phi'm pdiang satia ia ka jingphla jong ngi. **12** Lada nga la iathuh ha phi ia kiei-kiei-ruh kiba ha ka khyndew, bad phi'm ngeit, kumno phi'n ngeit, lada nga iathuh ha phi ia kiei-kiei-ruh kiba ha bneng? **13** Te ym don uba la leit-kiw sha bneng, hynrei tang uta uba la wan-hiar na bneng, U Khun u briw kein, uba don ha bneng. **14** Kumba U Moses ruh u la kyntiw ia ata u bsein ha ka ri-khlaw, kumta ruh ka dei ba yn kyntiw ia U Khun u briw: **15** ba uei-uei-ruh uba ngeit ha u, u'n ym jot shuh, hynrei u'n loh ka jingim b'ymjukut.

**16** Naba U Blei u la ieit katta-katta ia ka pyrthei katba u la aiti-noh ia la U Khun ba la kha-marwei, ba uei-uei-ruh uba ngeit ha u, u'n ym jot shuh, hynrei u'n iob ka jingim b'ymjukut. **17** Naba U Blei u'm shym la phah ia la U Khun ha ka pyrthei, ba u'n pynrem ia ka pyrthei, hynrei ba yn pynim ia ka pyrthei da u. **18** Uta uba ngeit ha u yn ym pynrem, hynrei uta ub'ym ngeit u la rem lypa; naba u'm shym la ngeit ha ka kyrteng U Khun U Blei ba la kha-marwei. **19** Kane te ka long kata ka jingpynrem, ba ka jingshai ka la wan ha ka pyrthei, had ki briw ki la laieit kham-tam ia ka jingdum ban ia kata ka jingshai; naba kl la long b'ymman ki jingleh jong ki. **20** Naba u briw baroh uba iaileh ia kaba sniw, u shun ia kata ka jingshai, bad u'm wan ha kata ka jingshai, ioh ba yn sneng pyrshah ia ki jingleh Jong u. **21** Hynrei uta uba iaileh ia kaba shisha, u wan ha kata ka jingshai ba yn ioh pynpaw ia ki jingleh jong u, ba ba U Blei la leh ia ki.

**22** Hadien kine kiei-kiei-ruh U Jisu u la leit bad ki synran jong u sha ka ri-bri Ka Judia; hangta u la sah lem bad ki, bad u la pynbaptis. **23** Te U



Ioannis ruh u dang pynbaptis ha Ainon, hajan Ka Salim, naba la don hangta bun ki um: te ki la iawan, bad la pynbaptis ta ki; **24** naba ym pat thepbyndi ia U Ioannis.

**25** Ynda kumta la mih ka jingiasaid na ki synran U Ioannis bad U Jiw, shaphang ka niam jingpynkhuid. **26** Te ki la ialeit ha U Ioannis, bad ki la iaong ha u, Ko Rabbi, uta uba la don lem bad me sha shil liang Ka Jordan, ia uba la phla babha ma-me, ha khmih, uta u pynbaptis, bad baroh ki ialeit ha u. **27** U Ioannis u la iathuh bad u la ong, U briw u'm lah ba'n ioh-diang ei-ei-ruh-em l'ynda la ai ha u na bneng. **28** Phi hi ruh phi iaphla ia nga, ba nga la ong, Nga nga'm long uta U Khrist, hynrei ba nga long uta ia uba la phah ha shuwa jong u. **29** U nongleit-kurim u long uta uba ioh ia ka nongleit-kurim: hynrei u lok jong u nongleit-kurim, uba ieng bad uba ioh-sngew ia u, u kmen shibun namar ka ktien uta u nongleit-kurim: namarkata, kane ka jingkmen ka jong nga ka la biang. **30** Ka dei ia u ba'n man-khraw, hynrei ia nga ba'n man-rit. **31** Uta uba wan na jrong, u long halor baroh: uta uba long na ka jong ka khyndew, u long na ka jong ka khyndew, bad ia ka jong ka khyndew u kren: uta uba wan na bneng u long halor baroh: **32** te ia kaba u la ioh-i bad ba u la ioh-sngew, ia kata u phla: hynrei ym don ba pdiang ia ka jingphla jong u. **33** Uta uba la pdiang ia ka jingphla jong u, u la pynskhem ba U Blei u long uba shisha. **34** Naba uta ia uba U Blei u la phah, u kren la ki ktien jong U Blei: naba U Blei u'm ai ia U Mynsiem da ka jingthew. **35** U Kpa a ieit ia U Khun, bad u la ai ia kiei-kiei baroh ha ka kti jong u. **36** Uta uba ngeit ha U Khun, u don ka jingim b'ymjukut; uta te u b'ymkohnguh ia U Khun, u'n ym ioh-i la ka jingim: hynrei ka jingbitar jong U Blei ka iaisab halor jong u.

#### 4

**1** Namar-kata, ynda U Trai u la tip ba Ki Pharisi ki la ioh-sngew ba U Jisu u pynlong bad ba u pynbaptis kham-bun ki synran ban ia U Ioannis, **2** (la U Jisu hi shisha u'm shym la pynbaptis, hynrei ki synran jong u;) **3** u la iehnoh ia Ka Judia, bad u la leit pat sha Galilaia. **4** Te ka la dei ia u ba'n

leit lyngba ia Ka Samaria. **5** U la poi, namar-kata, sha ka shnong ha Samaria bakhot Sikhar, hajan kata ka khyndew ia kaba U Jakob u la ai ha U Joseph u khun jong u. **6** Te hangta ka la don ka pukri U Jakob. U Jisu, namar-kata, ba u la thait na kata ka jingleit, u la shong kumta halor kata ka pukri: te ka la long hamar kaba hynriw baje. **7** Kawei ka briw na Samaria ka la wan ba'n tong um: U Jisu u ong ha ka, To ai ha nga ba'n dih. **8** (Naba kl synran jong u ki la lah leit-noh sha kata ka shnong, ba ki'n io i-thied jingbam.) **9** Ynda kumta kata ka briw kaba long ka nong-Samaria ka ong ha u, Kumno ma-me U Jiw, me pan ba'n dih na nga, kaba long ka nong-Samaria? naba ki Jiw ki'm ju ialok bad ki nong-Samaria. **10** U Jisu u la iathuh bad u la ong ha ka, Ba pha'n da la ithuh ia ka jingai-ei ka jong U Blei, bad uei u long uta uba ong ha pha, To ai ha nga ba'n dih; pha hi pha'n da la pan na u kein, u te u'n da la ai ha pha ia ka um kaba im. **11** Kata ka briw te ka ong ha u, Ko Kynrad, me'm don jingtong ei-ei, kane ka pukri ruh ka long kaba jilliw: namar-kata, nangno me ioh kata ka um kaba im? **12** Hato me khamkhrav ma-me ban ia u kpa jong ngi U Jakob, uba la ai ha ngi ia kane ka pukri, bad u la dih hi ruh na ka, bad ki khun jong u, bad ki jingri jong u? **13** U Jisu u la iathuh bad u la ong ha ka, U briw baroh uba dih na kane ka um u'n sliang pat; **14** hynrei uno-uno-ruh uba'n dih na kata ka um, ia kaba nga nga'n ai ha u, u'n ym sliang lano-lano-ruh; hynrei kata ka um, ia kaba nga'n ai ha u, ka'n long ha u ka pukri ka um kaba kyrsoi sha ka jingim b'ymjukut. **15** Kata ka briw ka ong ha u, Ko Kynrad, to ai ha nga ia kane ka um, ba nga'n ym sliang, l'ymne wan hangne ba'n tong. **16** U Jisu u ong ha ka, To khie-leit, khot ia u tnga jong pha, bad to wan hangne. **17** Kate ka briw ka la iathuh bad ka la ong, Nga'm don tnga. U Jisu u ong ha ka, Pha la ong kaba dei, Nga'm don tnga: **18** naba san-ngut ki tnga pha la ioh bad uta uba pha don mynta ruh, u'm long u tnga jong pha: ia kane pha la kren kaba shisha. **19** Kata ka briw ka ong ha u, Ko Kynrad, nga sngewthuh ba me long u nongiathuhlypa: **20** ki kpa jong ngi ki la iamane-Blei halor une hi u lum; phi te phi ong, ba ha Jerusalem ka long kata ka jaka, ha kaba dei ba'n mane-Blei. **21** U Jisu u iathuh ha ka, Ko ka briw, to ngeit ia nga, ba ka por ka jia, haba phi'n ym iamane ia U Kpa, halor une u lum, l'ymne ha Jerusalem: **22** phi iamane-Blei kat kum ia kaba



phi'm tip, ngi iamane-Blei kat kum ia kaba ngi tip: naba ka jingpynim ka long na Ki Jiw; **23** hynrei ka por ka jia, bad ka long mynta kein, haba ki nongiamane-Blei kiba shisha, ki'n iamane ia U Kpa ha ka mynsiem, bad ha kaba shisha; naba U Kpa ruh u wad ia kiba kum kita ba'n iamane ia u: **24** U Blei u long U Mynsiem: te ka dei ia kiba mane ia u, ba'n mane ha ka mynsiem bad ha kaba shisha. **25** Kata ka briw ka ong ha u, Nga tip ba U Messiah u wan, (ia uba ki khot U Khrist:) ynda la wan uta, u'n batai-shai ha ngi ia kiei-kiei baroh. **26** U Jisu u iathuh ha ka, Nga long uta, uba kren bad pha.

**27** Hamar kane ki synran jong u ki la wan ruh; te ki la iasngew- kyndit ba u la iakren bad ka kynthei: pynban ym don ba kylli, Kaei me wad? lane, Balei me iakren bad ka? **28** Ynda kumta kata ka briw ka la iehnoh ia la u khiw-um, bad ka la leit-noh sha kata ka shnong, bad ka ong ha ki rangbah, **29** To ale, to khmih ia a briw uba la iathuh ha nga ia kiei-kiei baroh kat kiba nga la leh: une u long ne em uta U Khrist? **30** Namar-kata, ki la iamih-noh na kata ka shnong, bad ki la iawan ha u.

**31** Hamar-pdeng kata te, ki synran ki la iakyrpad ia u, ki da ong, Ko Rabbi, to bam. **32** Hynrei u la ong ha ki, Nga nga don ka jingbam ba'n bam, ia kaba phi phi'm tip. **33** Namar-kata, ki syn- ran ki la iaong paralok-hi, Don mano-mano ba la wallam ei-ei ha u ba'n bam? **34** U Jisu u ong ha ki, Ka jingbam jong nga long, ba nga ioh-leh ia ka mon ka jong uta uba la phah ia nga, bad ba nga'n ioh-pyndep ia ka kam jong u: **35** phi phi'm ong, ba sa saw bnai, ka'n long ka aiom-ot? ha khmih nga ong ha phi, To khmied ia la ki khmat, to jngoh ia ki lyngkha; naba ki la byllieh lypa ia ka aiom-ot: **36** uta uba ot te u iohdiang ia ka bainong, bad u lum soh ia ka jingim b'ymjukut: ba uta uba bet ruh u'n ioh iakmen lem bad uta uba ot; **37** naba ha kane kata ka ktien ka long kaba shisha, Ba u long uwei uta uba bet, uwei-pat ruh uta uba ot. **38** Nga nga la phah-noh ia phi ba'n ot ia kata kaba phi phi'm shym la treiminot: kiwei-pat ki la iatrei-minot, phi pynban phi la ioh bsut sha ka jingtrei-minot jong ki.

**39** Ta shibun na ki nong-Samaria na kata ka shnong ki la ngeit ha u namar ka jingong jong kata ka briw, kaba ong skhem, U la iathuh ha nga ia kiei-kiei baroh kat kiba nga la leh. **40** Namar-kata, mynba kita ki nong-Samaria ki la iawan ha u, ki la iakyrpad ia u ba'n iaisah bad ki: te u la sah hangta ar-sngi. **41** Te kham bun shuh ahuh ki la ngeit namar ka ktien jong u hi; **42** ha kata ka briw te ki la iaong, Mynta ngi ngeit, ym namar kata ka jingong jong pha shuh; naba ngi la ioh-sngew mangi hi ia u, bad ngi iatip ba une u long shisha U Khrist U Nongpynim jong ka pyrthei.

**43** Te hadien kita ki ar-sngi u la mih-noh nangta sha Galilaia. **44** Namar U Jisu u la phla hi, ba u nongiathuh-lypa u'm ioh ia ka burom ha ka ri jong u hi. **45** Te ynda u la poi sha Galilaia, kita ki nong-Galilaia ki la pdiang sngew-bha ia u, haba ki la ioh-i ia klei-kiei baroh ia kiba u la leh ha Jerusalem ha kata ka jingkhawai-niam: namar ki ruh ki la leit sha kata ka jingkhawai-niam.

**46** Kumta U Jisu u la leitpat sha Kana Galilaia, ha kaba u la lah pynlong wain ia ka um. La don te uwei u rangbah s'iem, uba u khun jong u u la pang ha Kapernam. **47** Une, haba u la ioh-sngew ba U Jisu u la wan na Judia sha Galilaia, u la leit ha u, bad u la kyrpad ia u ba u'n wan-hiar bad ba u'n pynkhiah ia u khun jong u: naba uba'n sa iap. **48** Ynda kumta U Jisu u la ong ha u, L'ynda phi'n ioh-i ia ki dak bad ia ki kam phylla, phi'n ym ngeit satia. **49** Uta u rangbah s'iem a ong ha u, Ko Kynrad, to iawan-hiar katba i'm put iap-noh i khun jong nga. **50** U Jisu u la iathuh ha u, To khie-leit-noh; u khun jong me u la im. Uta u briw u la ngeit ia kata ka ktien kaba U Jisu u la ong ha u, bad u la leit-noh. **51** Hangta te haba u dang leit-hiar, ki shakri jong u ki la iawan-tan ia u, bad ki la ong, U khun jong me u la im. **52** Ynda kumta u la kylli na ki la ka por, ha kaba u la sngew kham-koit. Te ki la iathuh ha u, Mynhynnin, ha kaba hynniew baje, ka khie-shoh ka la iehnoh-dak ia u. **53** Kumta uta u kpa u la tip ba ka la long ha kata ka por hi, ha kaba U Jisu u la ong ha u, "U khun jong me u la im": te u hi u la ngeit, bad ka ing jong u baroh kawei. **54** Ia kane pat ka kambah kaba ar U Jisu u la leh, hadien ba u la wan na Judia sha Galilaia.

